

111 年全國語文競賽客家語朗讀文章國小學生組（詔安腔）

編號 1 號

【心色个童年】黃美貞原作

細漢个時，細子人無科技產品會用賞；毋過，屋簷下、杌仔樹、伯公下、大圳溝、竹頭下，做下攏係佢人賞个所在。

佢人四姊妹，加上隔壁屋邊个細子，輒輒作埕扮家貨、弈紙牌¹、藏膨嬰這兜，若係堵著毋使讀書个下晝頭，定著賞到暗，等到大人擎竹修來尋細子，大家睜著毋係勢正奔²到無睜人。

好天个時，佢人嘛真愛在圳溝底摸蜆子。有一擺，風神个阿弟喋喋嘍，相輸佢捉會著細尾蝦，上屋个阿賢興趣趣應：「按愛仰子輸贏？」阿弟誚躡佢：「你若係捉比佢較多，今日佢請你食暗頓。」阿賢毋會堪得人激，應講：「好！無問題！」遐下晝，佢人先掘水窟，想討拗蝦錫到水窟底，毋過，細尾蝦哪有恁快捉，兩下半蝦即跳走了了，佢人感覺無意思，早即走淨淨。無想著佢兩儕毋認輸，目珠眨都無眨，舞到歸身溼漉漉、扃扃糟糟歸膺身泥，水窟底單單兩三尾細尾魚定，等到暗摸摸，無奈無何正攔緊轉屋下，管佢麼儕贏？若係攔毋轉，毋單無飯好食，猶會趁

¹ 弈紙牌：音 e zhi^ˆ pe^ˆ；紙牌，指孩童時期玩的圓形紙牌，圖案多為卡通人物或電視、電影劇中人物。

² 奔：音 pun^ˆ；極度驚恐下的快速奔跑。

一頓皮疾。

又有一日，翁熱个下晝頭，佢人兄弟姊妹在屋下四圍賞藏膨嬰。阿弟係細子頭王，哪位攏尋有位好藏，賞幾下輪猶賞毋會煞棚。無想著坐在屋簷下个阿媽大聲喊：「較緊轉來！莫在遐頭牛眼樹下賞，遐位真多笏角蟲哦！」成過个細子輒輒打赤腳賞到毋知天地，樂暢樂暢个佢人，無拗阿媽个事聽入耳，落尾做鬼捉人个阿妹好定泥睜著遐生到烏疏疏，有十外公分長个笏角蟲，對佢趁過來，驚到奔走都走毋會赴！嘎「哇——」一聲嘍出來，嶄然愛賞个阿弟，興趣趣行佢想討攔遐尾笏角蟲，阿媽氣壞壞喝：「你若係得佢趁著膺身，即會像貓拖棗——難敲爪³哦！」

「良言莫嫌少，朋友莫嫌多。」細漢時跔同學伴、隔壁屋邊个細子攪伴攪陣，滿哪位攏係佢人共下行過个腳跡、睜過个景色、賞過个心色事，係佢人細子頭懷念个童年，遐兜心色个回憶和畫面，永久都會留在佢个頭那底。

³ 敲爪：音 lud^ˆ ziau^ˆ；本指爪子脫落，後亦借指人脫離困境或陷阱。此指像貓爪抓到麻糬一樣，難以脫身。

111 年全國語文競賽客家語朗讀文章國小學生組（詔安腔）

編號 2 號

【拜祖先】李雪菱原作

這擺五月節，阿怙仔渡僱人轉伙房屋去拜祖先，有真多牲儀排在神桌嶼，算算有五六十戶。叔公講：「若係講過年擱會較多，蹓外位个會轉來，有七八十戶恁多。」輪著點香个阿亮叔比手畫腳，指揮大家牲儀排好勢。除了三牲以外，僱人中片伙房个子孫猶會另外準備五碗炒好个齋菜，阿媽拗僱人講係因為公太食齋，阿公講：「這兜係五燥五溼。」僱睜有柿花、牛眼乾、麻糍米糍、冬瓜糖、地豆糖，猶有炒好个香菇、木耳、金針、筍乾、冬粉這兜，心肝底想：「鬥底係公太愛食？抑係僱人愛食？」

拜好啊，愛等凇酒，大家開始答嘴鼓，遐裡伯公講起成過蹓在伙房屋，伙房屋分上片、中片、下片，拜祖先个時務有真多人。時代變啊，伙房屋蹓毋會落，少年个搬出去外頭蹓，這下正伸三四十戶，睜起來有一兜仔冷清，所以，過年過節大家愛轉來鬥陣。

這裡細阿叔講：「較早下片阿木叔豬滌脣野生一頭杙仔，阿葉哥會渡僱人歸陣細子去捋來食，若係得阿木孀睜著，會擎祛齊來捎，僱人走到無命，毋知討藏在哪位正好，到這下猶會驚到發

夢。」大家聽到哈哈大笑。你一句僱一句，笑聲滿廳下，實在有鬧熱。

這兜叔婆伯孀企在神桌脣，比著毋知係哪儕个雞，直直講供到真靚。細阿孀得大家睜到面紅紅，又真歡喜講係佢个。叔婆斡頭拗阿姊講：「你人旨嫁个妹子來睜一下，倒魚正肉雞中央，愛記得！毋好排毋著，正毋會得人講無教導。」

另外一裡少年人企共下，手提手機，滑來滑去，有時交頭接耳講一下，有時問愛仰子下載影片；猶有人戴耳機搖來搖去，一睜即知在聽熱門音樂。外頭禾坪一大陣細子猴跔阿弟走上走落，捎來捎去，毋知賞麼个遊戲？睜毋識哦！

阿亮叔喊：「凇酒、凇酒，銀紙愛先拆便。」仰子恁緊咧？嘴鼓都猶旨講煞，歸下个人尖佷去隨人家庭凇酒，一下子無閒挾掣，倒手交正手。三擺酒過後、燒銀紙、放炮。

鬧鬧熱熱个伙房，一米籬个心色事，永遠都講毋會了，跔酒香飛出來、炮聲傳出來，這係幸福个香，這係幸福个聲！

111 年全國語文競賽客家語朗讀文章國小學生組（詔安腔）

編號 3 號

【外公个紅棗細寶貝】劉純汝原作

記得偌略略仔識事到今，逐年在翕熱个暑假，阿依總會渡偌轉外公屋下，因為外公蹠在苗栗公館客莊，種一大片紅棗樹，七、八月攔工時務，屋下大細會轉來鬥相共。

收成攔事个逐晨早，天甫光，外公、外媽、阿舅和姑婆總係帽、手扣、長褲、鞋笏……歸身包好勢，攞大大細細个塑膠桶、布袋這兜，出發去園捋紅棗啊！見擺，偌總係睡過頭跔毋會著，即單單在屋下鬥擇紅棗个份。十歲週年，得偌印象真深，打早猶言五點就款款跋起來，恬恬仔著好衫褲，在廳下等外公佢人。

外媽睭著偌著驚一下：「啊哦，你這個細子，日頭都猶在遐睡，坐在這位做麼个啊？」

「得偌跔好無？」

外媽續落講：「鎮手鎮腳即會，棗子樹全笏了了，若係得佢劓著，會哀天哀地！大人無閒挾掣，即無人會插你！」

顛倒頭惜偌个外公，笑笑个講：「毋畏，得阿瑄跔，佢嘛真久無去紅棗園啊，共下來去睭外公个紅棗細寶貝哦！」

「新娘上轎——第一擺」得偌跔著啊！一落到園底，偌像飛

出鳥籠个鳥，暢壞壞，著面行著面捋、著面食著面行！哇！逐串都紅紅大粒、精神飽滿；咦！偌聽著樹嶼絡食个細隻鳥啾啾，鬧熱滾滾啾無歇，唱出一條條好聽个歌哦！細樹極後背仰子會藏恁心色个笏角蟲咧？在遐蠕蠕動像跳舞个樣；猶有真多毋識睭過个細隻蟲，滿哪位越來越去賞藏膨嬰。「你人愛細義，毋好得棗个笏劓著哦！」睭到全無矚目个偌，好心拗佢人提醒，嘎添放係來鬥相共个！

識得過「紅棗王」个外公，紅棗係佢个細寶貝，一路來，用真多心思照顧像滿子个佢人，外公不時講：「人勤地獻寶，人懶地生草。用心照步來做，即會打出品質一等好个紅棗哦！」兩年前，外公身體無快活，已經無法度去園做事，現時个紅棗嘛較歉收，細寶貝可能係日思夜想外公，嘎添放愛好好大啊！

偌想討拗外公个紅棗細寶貝深深感謝，你人串出外公个歡喜農場，你人連起歸屋下个幸福味素，你人猶得偌有樂暢个童年回憶。偌人共下來祈求外公大寶貝，愛平平安安、康康健健哦。

111 年全國語文競賽客家語朗讀文章國小學生組（詔安腔）

編號 4 號

【一場有意義个活動】林惠美原作

學校就近有安養中心，有一擺，佢人和學校參詳想討安排老儕來學校「行」寮，學校真決裁¹个答應；為著這擺个活動，學校參詳兩個班級主導、進行大部分个活動齣頭²，學校先生想講佢个班級會得俾靠个，所以即拗進前个訪問、煮食、招待个活動得佢人負責。

訪問單內底有七個問題，係討了解阿公、阿婆佢意食麼个？想愛麼个？學校按算參考這兜資料設計活動个過程和準備个物件。先生無希望佢人提單做紀錄，所以喊大家先拗問題記起來，先安排「拗愛送入安養中心」；餉過點心，佢輕輕拗阿婆舂肩頭，著面舂著面和佢答嘴鼓，佢問：「阿媽，你頭想愛麼个？」佢頭犁犁應：「佢想討轉屋下。」一臨酸酸个味素衝上佢个心肝頭，目汁忍个毋敢流出來，行出大門，佢順佢个面頰卵直直流……。

阿公、阿婆來啊哦！一組同學撻佢人覘校園，逐個所在攏有

「小小解說員」拗佢人做紹介，趁這個時務，佢人煞煞拗在學校个田捋轉來个菜擇擇个、洗淨俐；先生吩咐切菜个同學愛切幼幼，較硬个莖無愛；大家擇菜个擇菜、切菜个切菜、起火个起火，分工合作，兩下半即拗阿公阿婆个點心準備好啊！佢人拗佢人撻在安排好个位，著面餉老儕食點心，著面聽社服人員和佢人講个事，先生感覺著氣氛無麼个著，即行去頭前……。

「大哥、大姊，猶記得佢無？想佢無？」先生笑容滿面个問，阿公、阿婆黏時面就笑起來，猶應：「有哦！有哦！」先生和佢人答訖、講笑，過後，先生面相變莊嚴个拗佢人講：「其實，你人个序細嘛真有孝，顧慮屋下無人好睺顧你，驚你跌倒、擘心你無伴，又愛趁食，無奈何正會送你人來安養院；大家有緣分作埤即愛寶惜，答應阿妹，對今日開始，逐日快樂个過日好無？」有人直直頓頭；有人大聲个應好；有人流目汁頓頭。睺著阿婆流目汁，佢个心又疾起來啊。

參加活動過後，深深个了解老儕人心肝底个孤單，佢想：今後佢定著愛好好照顧阿公、阿媽，有孝佢人，毋會擱應嘴應鼻啊！

¹ 決裁：音 quad' cai'；果斷、毫不猶豫。

² 活動齣頭：音 ua tung chid' teu'；齣頭原意是指名堂、狀況、情形，本文是指活動進行的內容、方式。

111 年全國語文競賽客家語朗讀文章國小學生組（詔安腔）

編號 5 號

【筍蛄】羅紫云原作

「蛄」這個字係講殼丁丁个蟲，像雞油蛄、牛屎蛄、金蛄、花蛄這兜，除了花蛄以外，佢人細漢時攞係雞嫲蟲，毋過「筍蛄」有較特別，細漢時有一兜仔像雞嫲蟲，毋過佢無腳，啊攞正食竹筍定，像烏葉竹、綠竹筍攞係佢个頭愛。

「半天斬竹毋使刀，泥下耨空無用鋤，今年著白衫，明年著綾羅。」這係臆謎猜，說明筍蛄个一世人，今年著白衫鑽落泥底過冬，明年正著派頭靚靚个衫出來結婚降子。

有一日，屋下人去山嶼耨竹筍，家濟趟出一隻寶物來，遐係真久真久無睺著个——「筍蛄」，國語講「臺灣大象鼻蟲」。背脊嶼柑色猶有烏斑，烏斑較圓个講做「笠婆」係公个，烏斑較尖个講做「雨傘」係嫲个，翼有烏色條紋，無飛个時，翼會收到翼胛內底。食肚烏色，用佢帶鏈條掛鈎个腳溫柔个攞竹筍，攞用佢長長像啲管个嘴筧，慢慢仔剪啊剪，一下子即得佢剪一空食竹筍，順續扁卵落去。

無幾久，蟲卵變幼蟲慢慢仔大，竹筍尾截即得佢利利个剪剪斷跌到竹頭下，佢人精精个細子，歸日會在竹頭下鑽上鑽落拚勢

尋，若係尋著遐又大又肥，黃恹恹个「筍蟲¹」，拗筍蛄共下園在火堆埔抑係鑊煎，遐香香酥酥个美食，發夢想著口涎水都會流出來。

另外，筍蛄真好捉，在竹頭下目珠向面上睺，竹筍尾若係有筍蛄黏滯，即愛拗竹筍攞緊搖一下，佢即跌落來，毋過佢會假死，四腳翹天恬恬倒在遐，食肚又係烏色，無注意睺即會得佢惑去啊。成下運氣好會捉著幾下隻，又嘛會用提線緝佢个腳，真會飛，細子即會用賞歸畫。

恁多年來，屋脣个竹筍逐支攞出尾²，真少睺著佢个身影，佢直直怨自家係毋係拗筍蛄食淨淨，佳載又睺著佢，佢歡頭喜面翕落佢个特寫了後，煞煞拗佢捉到竹園底去得佢自由生活，希望佢煞煞傳宗接代，開枝散葉。

¹ 筍蟲：音 sun^ˆ chung^ˋ；筍蛄的幼蟲。

² 出尾：音 chid^ˊ mui^ˇ；竹筍有完全長成，無斷尾，表示沒有筍蛄咬過，沒有筍蛄出沒。

111 年全國語文競賽客家語朗讀文章國小學生組（詔安腔）

編號 6 號

【 僱會鬥相共啊 】 廖惠貞原作

僱在屋下排頭大，阿依講：「頭大个愛有好樣。」所以僱輒輒渡阿妹共下學習和鬥相共，阿媽講：「有緣正共家門，屋下人愛共心。」所以僱真聽事。

僱生到高天天，毋過僱今年正十空歲定，猶係細子。屋下个序大人有四儕，阿公、阿媽、阿怙仔和阿依。僱睡序大人歸日愛上班趁錢，逐日做到無睺人面，真辛苦哦！細子當然愛加學兜加做兜事正好啊！

自細僱即恰意在灶下睺阿依煮食，僱對讀一年開始，即會鬥相共。阿依煮菜僱煮湯，兩儕歡喜鼻香，七手八腳菜即上桌，阿怙仔講僱恁乖，阿妹拗僱拍手，僱越學即越快樂！僱嘛真愛跔阿媽去市場。市場係鬧熱又心色个所在。會用熟事真多物件，尤其係青菜，像苦瓜和金瓜愛掛皮煮，蘆薈和瓠子愛剝皮，芹菜愛食莖，番薯葉、芥藍菜葉和莖攏會用食，笏瓜洗淨俐即會用食，蔥葫仰子分，這兜攏係在買菜个時學著个。

逐日除了微毛末節像：揉泥下、撿掣、收衫褲這兜，僱猶會學煮飯。有一擺，阿依出門，阿媽真擘心，僱講：「阿媽！毋使

擘心，當晝僱來煮。」米洗好，因落電鑊煮，堵好有一鑊封肉，僱因到瓦斯爐用文火暖燒，續落煎卵包，炒一盤薤菜，攏煮一鑊包粟湯，阿依教過僱煮湯愛細義，毋好爇著¹！僱猶放芫荽菘香，兩下半即喊阿妹排碗箸，喊阿公、阿媽食飯！阿公、阿媽講：「僱慧孫女大漢啊！恁慶！」僱感覺真風神！

僱去到學校嘛會鬥相共，因為僱係「細先生」。睺先生歸日無閒挾掣，愛改一堆个簿子，所以僱會拗先生鬥相共，當晝頭攏無歇睏。提紅筆，目珠擘金金檢查同學个簿子，毋著个就用紅筆箍起來，正攏請同學改過來，又順續教一下毋會个人，按个頭路僱毋會恂，感覺有拗同學鬥相共。

有一句事講「多學多得」，正經哦！僱學著真多，感謝序大人得僱機會又信任僱，僱會繼續學習，僱會煮飯啊！

¹ 爇著：音 lu choo；燙到。

111 年全國語文競賽客家語朗讀文章國小學生組（詔安腔）

編號 7 號

【香菇】徐姿華原作

頭惜佢个細阿姨年初結婚，姨丈屋下在種香菇，有真大片个香菇寮，阿姨招佢人去寮，順續去菇寮剪香菇，佢講親身剪个菇特別好食；自一溜即愛食香菇个佢，得阿姨按出招，越想討去，總係直直亂阿依，愛佢渡佢人去體驗剪香菇。

阿依即安排一擺中部探親旅行，佢晝佢人即到位細阿姨屋下啊，親家嚮真熱情，又泡茶又切果子招待佢人，當晝係真特別个香菇大餐，各式各樣个香菇料理，有萋萋个香菇炒肉絲、洋菇炒荷蘭豆、木耳炒番梨、焗到金黃香酥个金針菇、用幾下種菇煮个粳湯，清甜个香菇雞、鹹香个三杯杏鮑菇，猶有鹹豬肉、炊魚和炒青菜，滿足豐沛。

當晝食飽，大人在屋內坐、答嘴鼓，佢人細子即在禾坪走相捎，跳上跳落、賞到流汗答滴；阿姨捧出冰冰涼涼个梅湯得佢人止渴，遐冰冰甜甜摺酸沁酸沁个梅湯一落嘴，哇！實在真爽快啊！

姨丈提幾下个篩和剪刀得佢人，講討渡佢人去剪香菇，香菇寮無幾遠，行路五分鐘即到位啊；佢人細子興趣趣直直從入，想

討搶打先，姨丈攔緊喝佢人，愛先聽佢教仰子剪菇，正毋會打爽了言好收个香菇。

一行入種香菇个所在，兩裡和大人差不多高个鐵架，排恣恣裝有機樹屑个塑膠盞，盞嘴發真多細細金黃色个珊瑚菇，另外一裡係種咖啡色个柳松菇，較矮个架嶼係歸片个杏鮑菇，猶有一區係圍在泥下个太空包，種个係秀珍菇和金針菇；佢山遐向个壁嶼，憑歸大排種香菇个樹截，姨丈講用樹截種出來个香菇香氣足，會用賣較好價，毋過較否照顧。

恁大片个香菇寮，睭起來真淨俐相，隔十外分鐘即會噴一擺水霧，採光足、通風好，忒寒、忒熱嘛做下有控制，原本親家公用傳統方法來種菇，姨丈拗現代科技用在香菇寮內底，事頭變輕鬆、收成摺較好，實在無簡單。

佢人照姨丈个交代，小心細義剪菇，無幾久逐個篩做下裝恣各色各種个菇啊。討轉屋下个時，姨丈攔送佢人有菇菌个太空包，討得佢人隨轉去練習照顧，佢講早暗愛噴水，一兩禮拜即有菇通收啊，這個禮物實在真心色嘛得人真期待呢！

111 年全國語文競賽客家語朗讀文章國小學生組（詔安腔）

編號 8 號

【跋山】劉玉蕉原作

天旨光，狗旨吠，阿依即在咻啊！「阿榮啊，好起來，日頭討出來啊！」

「阿珍妹，攔緊著鞋哦，討出門啊！」

天甫光，日頭猶在睡，僱人歸屋下即目珠接接起腳行，共下去跋小中嶺山啊。路狹狹，草面上个露水旨開，得僱人个腳徑著，即歸串歸串輪落泥下，一粒一粒金箭箭像珍珠，全然靚！僱心肝內偷偷想：若用佢人來串一條珍珠駁鍊，送得阿依戴，毋知幾靚哦！

涼涼个風，一臨一臨吹來，路脣个花花草草，得佢吹到頓頭拗腰款款行禮，即像遐戲臺嶼，出力表演个大明星共款。行到山下，阿妹招僱拚輸贏，脛麼儕會用先跋上山嶼尾。兩儕即按頭犁犁，麼儕攏毋認輸，相爭拚向上。僱較大漢當然毋會用輸，歸路毋敢擋恬，鼻怩怩，大氣直直啟，直直拚上山，跋到山嶼，心頭擻蹣，佢跳到硬硬討恬去啊！

「哇！山嶼个風真涼呢！」脛落去，阿妹猶在半山腰，一個面頰卵紅激激，僱脛一下，廟个關公都無佢恁紅哦！一支嘴擘啊

擘，又像狗么在啟氣，實在真心色，真好笑！

山嶼个風，特別清，特別涼，風內底有東勢果子个香氣，有花花草草个清甜氣味，這風吹到人歸身快活，吹到人透心涼，進前跋山个艱難，到這下嘛攏歸下添放啊！樹嶼絡食个鳥吱吱喳喳，跳上跳落吱無歇，草墩个蟲毋願輸佢，嘛唧唧拂應聲。打早，山嶼即按鬧熱滾滾啊！望向遐山下，遠遠个東勢，到今猶蒙一緣紗，在濛內底睡猶毋知好醒咧！

「較緊，大家脛！真靚哦！」

東片个雲像點胭脂，紅牙紅牙，紅牙退去，係千條萬條个金色光，對山个後背射出來，無幾久，一粒大火球，即對山頭跳出來啊，晟到人目珠擘毋會開，晟到濛攔緊藏身。日時頭个事頭，對這下正正式起頭！

企在山嶼尾，僱人盡量享受打早个光景，登高遠望个開闊視野，得人心情快活，得人知感恩，感恩大自然賜得僱人按个好環境。阿怙仔不時講：「較早起來个鳥正有蟲好食。」到這滿，僱總算體會著這句事个意思啊！